

«ՊՈԼՈՑԵՆԻԵՆԻ» ՍՏԵՂԾՄԱՆ ՀԻՄՆԱԿՆԴՐԻ ՇՈՒՐՋ

Արևելյան Հայաստանը նվաճելուց հետո ցարական Ռուսաստանը սկսում է իրականացնել տարածաշրջանը պետական համընդհանուր կառավարման համակարգի մեջ ընդգրկելու ծավալապաշտական քաղաքականություն: 1828թ. Թուրքմենչայի և 1829թ. Անգրիանոպոլսի պայմանագրերի ստորագրումից անմիջապես հետո, երբ արդեն լուծված էր ռազմաքաղաքական խնդիրը, գերխնդիր է դառնում տնտեսական, քաղաքական և մշակութային նվաճումը: Արևելյան Հայաստանը Ռուսաստանի տիրապետության ընդհանուր ոլորտ ներքաշելու համար առանձնահատուկ դեր և նշանակություն է ձեռք բերում Ամենայն Հայոց կաթողիկոսությունը, որը, ինչպես գրում է պատմաբան Լեոն, «Իր էությամբ լինելով գերազանցորեն կրոնական հաստատություն, էջմիածինը իր վայելած համազգային դիրքի և նշանակության պատճառով հեշտ կարող էր յուրացնել իրեն և քաղաքական գորավոր դեր»¹: Հայ եկեղեցին համայն հայության համար մեծ հեղինակություն ունեցող, անկախությունից և պետականությունից զրկված ժողովրդի ազգային միակ հենարանն էր, որ դեռ ի վիճակի էր համախմբել և միավորել տարբեր երկրներում ապրող հայ հատվածներին և հարևան պետությունների կողմից ընկալվում էր որպես հայ ժողովրդի հոգևոր և աշխարհիկ ներկայացուցիչ: Ռուսական կառավարությունը կարևորելով հայ եկեղեցու համազգային նշանակությունը ձգտում էր «օգտագործել այդ աթոռի բարոյական հեղինակությունն ամբողջովին դարձնելով մի պարզ գործիք ռուսաց արտաքին քաղաքականության համար»²: Կայսերական Ռուսաստանի և Հայոց եկեղեցու հարաբերությունները դրվում է նոր մակարդակի վրա պայմանավորված քաղաքական ուղղվածությամբ և առաջադրված պահանջներով: Ցարական կառավարության շրջանակներում շարունակաբար քննարկվում էր եկեղեցական լայնածավալ քաղաքականության իրականացման խնդիրներ: Այդ նպատակով 1817 թվականի հոկտեմբերին կազմավորվեց հոգևոր գործերի և ժողովրդական կրթության միախառնություն: Յուրաքանչյուր երկրի, եկեղեցու քաղաքական առանձնահատկություններից ու հակասություններից ելնելով, տարբեր էին մոտեցումներն Արևելյան Հայաստանի, Վրաստանի և մահմեդական հոգևորականության նկատմամբ: 1801թ. սեպտեմբերի 12-ի հրամանագրով Ռուսական կայսրությանն է միացվում Արևելյան Վրաստանը Քարթլի-Կախեթյան թագավորությունը: Վրաստանի կաթողիկոսությունները լուծարվում են, փոխարենը ստեղծվում է էկզարխաթություն (ինքնուրույն մարզային ուղղափառ եկեղեցի), իսկ հոգևորական շերտը վերած-

վում է պետական գանձարանի կողմից վարձատրվող կայսերական աստիճանավորի: Վրացական ուղղափառ եկեղեցին կայսերական Ռուսաստանի համար, ներքին և արտաքին քաղաքականության մեջ, առանձին մեծ նշանակություն չուներ և հենց այդ նպատակաուղղված դրվածքն էլ մարմնավորվեց էկզարխաթության ստեղծման մեջ: Անդրկովկասում մահմեդական բարձրագույն հոգևորականության ղեկավար կենտրոնների բացակայությունը, Պարսկաստանի և Թուրքիայի կողմից կրոնական ազդեցությունը խոչընդոտում է ռուսական կառավարությանը լիակատար վերահսկողություն իրականացնելու: Անդրկովկասի մահմեդական հոգևորականության նկատմամբ: Ռուսական կայսրությունը ստիպված էր հաշվի առնել Անդրկովկասի մահմեդական հոգևորականության վրա Պարսկաստանի ունեցած մեծ ազդեցությունը և իր իսկ պետական շահերից ելնելով, պահպանում է մահմեդական հոգևորականության ունեցած արտոնությունները: Կառավարությունը միայն մասամբ է վերահսկողություն հաստատում մահմեդական հոգևորականության վրա: Սակայն կայսրության որդեգրած մեծապետական քաղաքականության մեջ միանգամայն այլ դեր էր վերապահվում Հայոց եկեղեցուն, որը մեծ նշանակություն էր ծեռք բերում հատկապես արտաքին քաղաքականության մեջ: «Էջմիածնի աթոռի քաղաքական նշանակության պահպանության անհրաժեշտությունը Թուրքիայի և Պարսկաստանի հայության համար, համայն հայության հոգևոր առաջնորդի ընտրության նրանց մասնակցության հնարավորությունը, պայմանավորեց հրաժարվելու վրացական փորձից»,³-գրում է պրոֆեսոր Վ.Գ.Թունյանը: Արևելյան Հայաստանի ազատագրության գործում Ս.Էջմիածնի անձնվեր մասնակցության դիմաց, Ռուսական կառավարությունը պահպանեց քաղաքական մեծ կշիռ ունեցող կաթողիկոսի դիրքը և Հայոց եկեղեցու սեփականության անձեռնմխելիությունը: Հաշվի առնելով Հայոց եկեղեցու համազգային նշանակությունը, հայ հոգևորականության ունեցած անգնահատելի ներդրումն Արևելյան Հայաստանի ազատագրման գործում կառավարությունը վարում էր երկդիմի և զգուշավոր քաղաքականություն: Ռուս-պարսկական և ռուս-թուրքական պատերազմների ավարտից հետո, Կովկասի կառավարչապետ Ի.Պասկևիչը կայսրության մեծապետական քաղաքականության իրականացնողն ու ջատագովը, հալածանքներ է սկսում և Ներսես Աշտարակեցու, և նրա կողմնակիցների դեմ: Ռուսաստանի հոգևոր գործերի նախարար Դ. Ա. Բլուդովին ուղղված մի գրության մեջ գրում է. «Հարկ եմ համարում ծանուցանել, որ մինչև հիմա էջմիածինի պատրիարքը եղել է զլուխ ոչ միայն հոգևորականության, այլև ընդհանուր Հայոց ազգի, նույնիսկ քաղաքական կառավարության մեջ, և պարսից տերությունը հայերին վերաբերվող բոլոր ղեպերում միշտ գործել է պատրիարքի ձեռքով: Բացի սրանից ռուսաց տերությանն այնպիսի անձ է հար-

կավոր, որ չարգելեր այս երկրի մեջ կարգ ու կանոն մտցնելուն»⁴¹։ Ցարական կառավարությանը հայտնի էր Ներսես Աշտարակեցու և հայ մի շարք գործիչների մտադրությունները Պարսկաստանի տիրապետությունից ազատագրված Արևելյան Հայաստանում հայկական թագավորություն հիմնելու մասին։ Արևելյան Հայաստանի Ռուսաստանին միավորվելուց անմիջապես հետո Ներսես Աշտարակեցին անմիջապես հեռացվեց և արքայից Բեսարաբիա։ 1828թ. Նիկոլայ կայսեր հրամանով, ըստ որի «Կայսերը գտնում է, որ արքեպիսկոպոս Ներսեսի ներկայությունն ազատագրված մարզում և առհասարակ Կովկասում կարող է ունենալ վնասակար քաղաքական հետևանք, և այդ իսկ պատճառով կարևոր է համարում ամենահարմար առիթով հրավիրել Ռուսաստան և թողնել բնակության, նշանակելով հավուր պատշաճի կարողություն և պարգևներ»⁵։ Կառավարության կողմից ձեռնարկվեցին քաղաքական քայլեր, որոնք ուղղված էին էջմիածնի մասնակցությունը նվաճված Արևելյան Հայաստանի վարչաքաղաքական գործերում բացառելու, կաթողիկոսական իրավունքները սահմանափակելու և հայ եկեղեցու ներքին գործերը վերահսկելու, պետական միջամտության ուժեղացմանը։ 1828թ. դեկտեմբերին 25-ին կայսերը հաստատում է կառավարության կարծիքը, որը ներկայացված էր արտաքին գործերի նախարար Կոմս Կ.Կ. Նեսելրոդեյի զեկուցման մեջ «Ըստ կամաց Ձերդ Սեծութեան, ստատս-սէկրետար(Ռուսաստանի հոգևոր գործերի նախարար(ըղգծումն իմն է.Հ. Ս)) Բլուդովը հաղորդեց ինձ Կոմս Պասկևիչի գրությունը նախ Ներսես արքեպիսկոպոսի տեղափոխելու մասին, և երկրորդ թե կարևոր է էջմիածնի Հայոց գլխավոր հոգևոր վարչության համար կանոնադրութիւն սահմանել։ Ես կարդացի նմանապես Եփրեմ պատրիարքի բարձրագույն անուն Ձերդ Սեծութեան գրուած նամակը։ Այս առարկանների վերաբերութեամբ մենք համաձայնեցինք նախ ժողովել բոլոր այն տեղեկութիւնները, որ կարելի կլինի գտնել արտաքին գործոց նախարարութեան դիւանում, և ապա երկուսս միասին որոշենք միմիայն ընդհանուր սկզբունքները, որոնց վրայ պիտի հիմնուի էջմիածնի գլխաւոր հոգևոր վարչութիւնը։ Այսուամենայնիւ մենք կարևոր ենք համարում Ներսես արքեպիսկոպոսին քաղաքավարի պատճառաբանութեամբ թողնել Բեսարաբիայում և արթուն հսկողութիւն ունենալ նորա նամակագրութեանց մասին ...»⁶։ Կարծում ենք, որ նոր գրավված տարածքներում իրականացվում էր մեծապետական քաղաքականություն և անձնական գործոնն, առանձին անհատների փոխհարաբերությունները չէին կարող որոշիչ դեր խա.լալ. ազդել քաղաքական դեպքերի ընթացքի զարգացման վրա, ինչպես գրում է Ալ Երիցյանը. — «Այսպես ահա Պասկևիչի և Ներսեսի անձնական յարաբերութեանց պատճառով յառաջ եկաւ Հայոց եկեղեցւոյ վարչութեան բարեկարգութեան խնդիրը և Կոմսի նշանակած վերոյիշեալ գաղտնի Կոմիտէտը

ծրագրեց այն կանոնադրութիւնը, որ յետոյ հաստատուեցաւ «Պօլօժնի» անունով⁷: Մինչդեռ Հայ եկեղեցական նոր կանոնադրության ստեղծումը, կառավարության կողմից իրականացվող քաղաքական ծրագրի մի մասն էր: «Երբ 1801թ ռուսական իշխանությունը հաստատուեցավ Վրաստանում,- գրում է Ալ. Երիցյանը. - իսկույն քաղաքական վարչությունը Հայայստանյայց եկեղեցոյ կառավարութեան և դրութեան մասին տեղեկություններ սկսեց ժողովել»⁸: Հայոց հոգևոր վարչության մեջ կարգ ու կանոն հաստատելու համար, Կովկասի կառավարչապետ Ի. Պասկևիչը յոթ կետից բաղկացած իր առաջարկություններն է ներկայացնում կառավարությանը, որտեղ մասնավորապես ասվում է. «Այժմ ձեռնամուխ լինել Հայոց եկեղեցու գլխավոր և դրական սահմանադրություն կազմելու, ճշտությամբ որոշել, թե որոնք են պատրիարքի, սինոդի, և վիճակավոր եպիսկոպոսների իրավունքները և սահման դնել ամենքի իշխանությանը: Իմ կարծիքով, ամենևին չպետք է ժամանակ կորցնենք այս մասին մի ընդհանուր կանոնադրության կազմելու համար...»⁹: Ծրագրվում է ստեղծել Հայկական եկեղեցական կանոնադրություն ռուսական կառավարության թելադրած պայմաններով և կառավարության վերահսկողությամբ, առանց հակասելու կայսրության վարած մեծապետական քաղաքականությանը: Բարենորոգումների անհրաժեշտությունը բխում էր նաև կայսերության պետական շահերից և կոչված էր հստակեցնելու ռուսական կայսրությանն արդեն հպատակ Հայոց եկեղեցու իրավունքները: 1831 թվականին, Կովկասի կառավարչապետ Ի. Պասկևիչին փոխարինած բարոն Ռոգենը գրում է Պ.Ա.Բլուդովին. — «Կարևոր է մի «պօլօժնի» կամ կանոնադրութիւն Հայոց եկեղեցոյ կառավարութեան մասին Անդրկովկասում, որ կարողանար օրինական պարտաւորութեանց սահմանների մէջ զսպած պահել որպէս կաթողիկոսին, նոյնպէս և էջմիածնական հոգևորականութեան միւս դասակարգերը»¹⁰: Հայոց եկեղեցական կանոնադրության մեջ կարգ ու կանոն հաստատելուն վերաբերվող հոգվածներում էլ արտահայտվում է պետական միջամտությունը, որը կարևորելով, Կ. Պոլսի նախկին պատրիարք, Մաղաքիա արքեպիսկոպոս Օրմանյանը գրում է. — «Եկեղեցական իշխանութիւնները լոկ բարոյական միջոցներ ունենալուն, և կարգապահութիւնն ու բարեկարգութիւնը բռնադատիչ միջոցներու ալ պէտք ունենալուն, յաճախ օգտակար եղած է և կըլլայ պետական միջամտութիւնը, նոյն իսկ եկեղեցական գործողութեանց մէջ»¹¹: Ռուսական կայսրության մեջ պետության և Հայոց եկեղեցու միջև հարաբերությունները կանոնակարգելու, եկեղեցին միապետության պահանջներին համապատասխանեցնելու այս ծրագրային դիտավորություններն եկեղեցական նոր կանոնադրության մեջ ընդգրկելու համար, Կովկասի կառավարչապետ Ի. Պասկևիչը 1830 թվականին Թիֆլիսում կազմակերպում է գաղտնի հանձնաժողով: 1829 թ.

ղեկտեմբերին Ի. Պասկևիչը գրում է նախարար Բլուդովին. «Պեկտեմբերի 26-ի գրութեամբս պատիվ ունեցայ, ի թիւս այլոց, հաղորդել Ձեզ Հայոց եկեղծոյ գործերի վարչության մեջ բարեկարգութիւն մտցնելու նախագիծը կազմելու համար ես ես հիմնեցի մի առանձին գաղտնի կոմիտէտ (յանձնաժողով): Այս կոմիտէտում ես անդամ նշանակեցի չորսին, որք են գեներալ- մայեօր իշխան Բեիբութովը, Հայոց վարդապետ Սերովբէն, Հայոց գրականության պրօֆեսօր Սիրբիդը (Շիրիդ-Ջրպետեան) և Կոլլեժսկի ասսեսօր Օչկին, որը միաժամանակ կլինի և գործերի կառավարիչը»¹²: Ի. Պասկևիչի լիակատար վստահութիւնը վայելող այս հանձնաժողովը պատրաստվում է առանց Եփրեմ Կաթողիկոսի գիտության և մասնակցության ստեղծել և Հայոց եկեղեցուն պարտադրել կանոնակարգ, որ այդքան մեծ նշանակութիւն ուներ Հայոց եկեղեցու հետագա ճակատագրի համար: Պատմական նյութերը Հայոց եկեղեցու մասին, որ ուղարկել էր արտաքին գործերի նախարարութիւնը սխալ և հակասական տեղեկութիւններ էին պարունակում, քանի որ վերցված էին XVII դարի կաթօղիկ քարոզիչների հրատարակութիւններից: Ներսէս Կաթօղիկոսը, ծանոթանալով Հայոց եկեղեցու տւոյան, վարչական օրենսդրության մասին ռուսական կառավարության ունեցած այդ ծեռագրերի գրաբար լեզվով թարգմանութիւններին, դրանց վրա մակագրում է. «Տեղեկութիւնք վասն կաթօղիկոսաց և պատրիարգաց Հայոց կարօտ մաքրութեանց»¹³: Թիֆլիսի հանձնաժողովի նախագիծը, Պետերբուրգում կառավարության կողմից հավանության չարժանացավ, որովհետև, ինչպէս գրում է Ալ. Երիցյանը. «պատրաստուած լինելով օրենսգիտութեան անհմուտ անձանց ծեռքով, միանգամայն զուրկ էր դրական օրենքի յատկութիւններից: Դա ոչ միայն թերի էր և անկատար, այլև իւր էական մասերում չէր համապատասխանում ոչ մեռ եկեղեցւոյ վարչական հոգւոյն և ոչ նոյն իսկ Բարձրագոյն իշխանութեան ցանկութեանց ու ձգտումներին»¹⁴: Թիֆլիսի նախագիծն իր առանձին կետերով խիստ սահմանափակում էր Կաթօղիկոսի իրավունքները, նրան կախման մեջ դնում Ս. Էջմիածնի ժայրագուն խորհրդից (Սինոդից), մինչդեռ. «Պետերբուրգում քաղաքական նպատակներով ցանկանում էին բարձրացնել Էջմիածնի կաթօղիկոսի նշանակութիւնը և պահպանել նորա հնաւանդ արտօնութիւնները»¹⁵: Անբավարար և թերի համարելով Թիֆլիսյան հապճեպ կազմված նախագիծը, կայսեր հրամանով Պետերբուրգում ներքին և արտաքին գործերի նախարարութեան կողմից կազմվում է նոր հանձնաժողով, որը պետական բարձրագոյն հաստատութեանը վայել այալրջութեամբ և պատասխանատւութեամբ, ծեռնամոխ եղավ նոր կանոնադրութեան ստեղծմանը, որն այնքան էլ հեշտ գործ չէր, Հայոց եկեղեցու մասին ստույգ և անհրաժեշտ տեղեկութիւնների բացակայութեան պատճառով «Ասոր հակառակ կաթօղիկոսարանը առծեռն կանոնագիրք մը չուներ

ներկայանալու, որով եւ վրան պնդելու հիմ ալ չունէր»¹⁶,- գրում է Մ. Օրմանյանը: Եկեղեցական կանոնակարգի ստեղծման աշխատանքը, որը ռուսական կառավարությունից պահանջում էր մեծ զգուշություն և օրենսդրական ձևակերպումների ծկունություն, տևեց զրեթ չորս տարի: Ալ. Երիցյանը և Մ. Օրմանյանը Պետերբուրգյան հանձնաժողովի կազմած այս նոր կանոնադրությունը հոգուտ եկեղեցու են համարում: 1836 թ. մարտի 11- ին Նիկոլայ Առաջին կայսր հրամանով հաստատվեց և կյանքի կոչվեց «Պոլոժենիեն Բարձրագույն կարգադրութիւն յաղագս կառավարութեան գործոց Լուսավորչական Հայոց եկեղեցւոյի Ռուսաստան» վերնագրով: Եկեղեցական այս նոր կանոնակարգը ուներ կրոնական, լուսավորչական բովանդակություն: Լեոն, «Պոլոժենիեն» դիտարկելով որպէս ազգային-մշակութային ինքնուրույնության հաստատում գրում է.- ««Պոլոժենիեն» միայն եկեղեցական կանոնադրության կանոնագիրք չէր, այլ դրանից ավելին, Ռուսաստանի սահմաններում ապրող հայության ազգային-կուլտուրական ինքնորոշման առանձնաշնորհում: Ռուսաստանի աստվածապետական -բռնակալական հասարակարգի մեջ, չեյին կարող լինել առանձնապէս ճանաչված ազգություններ, վորոնք իրավունքներ ունենային իբրև այդպիսիներ»¹⁷: Հայոց եկեղեցուն շնորհվեց ազգային-մշակութային ինքնուրույնության իրավունք. դպրոցական կրթության մենաշնորհ, թեև. «դրված կրոնավորական դիկտատուրայի կարգադրության տակ, տոգորված ամբողջովին կրոնով և եկեղեցականությամբ»¹⁸: Հայ եկեղեցու նոր կանոնադրության ստեղծման և բարենորոգման անհրաժեշտության հարցը վաղուց էր հասունացել հայ հասարակական շրջանակներում: Բնականաբար ռուսական կայսրության կողմից հաստատված «Պոլոժենիան» որոշ իմաստով բխում էր նաև հայ եկեղեցու ներքին բարենորոգման անհրաժեշտությունից.«Հայոց անիշխանության ժամանակները, մանավանդ վերջին դարերում,- գրում է Ալ.Երիցյանը,- Հայաստանյայց եկեղեցու կառավարությունը վերին աստիճանի անկանոն և անկարգ ընթացք էր բռնած: Կաթողիկոսը եպիսկոպոսների հետ, եպիսկոպոսները քահանաների հետ իսկ սոքա ժողովրդականաց հետ -ամենքն էլ վարվում էին ավելի ցախապետական և հայրական իրավունքով, քան թե եկեղեցական օրինաց համեմատ: Կաթողիկոսը պատժում էր կամ պարգևում ըստ քմակ և ճաշակին, առանց որևէ սահմանադրական օրենսդրութեան, և այդ կամքին հոգևորականները միակերպ հնազադում էին,որովհետև կաթողիկոսը իրենց Չլուխը և Հոգևոր հայրն էր»¹⁹: Սակայն Ռուսական կայսրության հիմնական քաղաքական միտումը Հայոց եկեղեցական կանոնադրությունում ռուսական ուղղափառ եկեղեցուց ներմուծած սիմոդի միջոցով եկեղեցական վարչության մեջ պետական ազդեցության շեշտադրություն էր: Այդ առիթով Ն.Ֆ.Լինչը գրում է, «Պոլոժենիան» կը շեշտէ եւ կը նդարձակէ այս

մարմնին (Սինդոդին) սահմանադիր իշխանութեան կարելոյութիւնը, եւ զայն կո-
ղմէ Կայսեր պատուակալ նախագահութեան տակ: Սինդոդին հրամանագիրները
սապէս կը սկսին. «Ռուսիոյ կայսեր հրամանով...»:²⁰ Ըստ «Պոլոժենիենի»
խորհրդարանի կամ սինդոդի կողմից կանոնակարգվում և սահմանափակվում էր
կաթողիկոսի բացարձակ իշխանությունը, իսկ այդ հարցը բարձրացվել էր 1780
թվականին Կ Պոլսի Զաբարիա պատրիարքի և Ղուկաս Կաթողիկոսի, որը
«շատ նախանձախնդիր էր Սայր Աթոռի գերագոյն իրավունքների պահպա-
նության»²¹, միջև եղած հակասությունների ժամանակ: Կանոնակարգվում էր
կաթողիկոսի ընտրությունը, վերջ տալով այնպիսի իրավիճակների, երբ
կաթողիկոսի ընտրության հարցը դուրս էր գալիս եկեղեցական շրջանակներից
քաղաքական և դիվանագիտական պայքարի առարկա դառնում, ինչպէս դա
եղավ Դանիէլ -Ղափթ հակամարտության ժամանակ: Ռուսական կառավարու-
թյան կողմից հայ եկեղեցուն պարտադրված եկեղեցական նոր կանոնակարգը
լայն արծագանք գտավ և ոչ միանշանակ ընկալվեց հայ իրականության մեջ
ժամանակի ազգային գործիչների կողմից արժանանալով տարբեր գնահա-
տակների: Դեռևս հնագույն ժամանակներից հայ եկեղեցին կառավարման
առումով ինքնուրույն ազգային եկեղեցի էր: Հայրենիքից դուրս հաստատված,
ազգային ինքնագիտակցության եկած և կազմակերպված հասարակական ուժ
ներկայացնող հայ վաճառականությունը և բուրժուազիան չէին կարող հան-
դուրծել ռուսական կառավարության կողմից արված ցանկացած ոտնձգություն
և միջամտություն հայ եկեղեցու, որպէս միակ ազգային հաստատության, ներ-
քին գործերում և կանոնակարգում: Տարբեր երկրների գաղթահայության շրջա-
նում «Պոլոժենիեն» հայ եկեղեցական ազգասիրական տեսակետից ապազ-
գային օրենք էր, որովհետև Հայ եկեղեցուն զրկում էր ինքնուրույն արտաքին
քաղաքականություն վարելու իրավունքից, և Հայոց կաթողիկոսը ստիպված էր
սփյուռքահայության հետ հարաբերությունները պահպանել ռուսաց արտաքին
գործերի նախարարության միջոցով: «Էքմիածնի ձեռք բերիլը,- զրոււմ է Ալ.
Երիցյանը,- չէր նմանիլ սովորական աշխարհակալութեանց, որովհետև
Էքմիածինն ընդհանուր Հայոց ազգի սիրտն է, և ում ձեռքին է այդ սիրտը, նա
բարոյապէս տիրապետում է ամենուրեք ցրուած հայերի վրայ»:²² 1836 թ.
ռուսաց կառավարության կողմից ընդունված «Պոլոժենիեն» Հայ եկեղեցիուն
զրկեց աշխարհիկ գործառույթներից: «Սիւս այս գործելակերպով -զրոււմ է
սփյուռքահայ քաղաքական գործիչ Գաբրիէլ Լազեանը.- աւելի դիւակ ռուս
իշխանութիւնը կրնար խեղդել հայ ժողովրդի ազգային բաղձանքները, որոնք
պիտի ներկայացունէին հայ եկեղեցական կազմակերպութեան խողովակով:
Ռուսները միշտ աշխատեցան այդ կարելուր ազդակը օգտագործել իրենց
պետական շահերուն համար, սակայն բախեցան հայ ժողովուրդի տեսական

ընդիմութեան»²³։ Արտասահմանի հայությունը, կաթողիկոսի իշխանության անսահմանափակ իրավունքները վերականգնելու համար, տարիներ շարունակ պայքարում էր սրբագրելու «Պոլոժենիեն»։ XIX դարի 60-ական թվականներին Մատթեոս կաթողիկոսին կառավարության կողմից հնարավորություն է տրվում «Պոլոժենիեն» վերաքննելու և հայ ժողովրդի կողմից առաջարկվող փոփոխություններ ձևակերպելու համար։ Սակայն Մատթեոս կաթողիկոսի ներկայացրած նախագիծը, որտեղ կաթողիկոսը իր չափազանց անկախ քաղաքական դիրքով ներկայանում էր մի թագավորություն թագավորության մեջ, ռուսական կառավարությունը մերժեց նույնիսկ քննության առնել։ Հետագայում Ալեքսանդր երրորդ և Նիկոլայ երկրորդ թագավորության, ցարական ռեակցիայի մռայլ շրջանում «Պոլոժենիեն»-ով Հայոց եկեղեցուն տրված իրավունքները համարվեցին չափազանց ազատամիտ և արտոնյալ։ «Սիւս այս շրջանում,- գրում է Լեոն,- հայերն արդեն ոչ միայն չէին մտածում Պոլոժենիենի վերաքննության մասին, այլև համարում էին այդ վերաքննությունը կատարյալ խորտակում իրենց ազգային իրավունքների»²⁴։ Միջազգային մեծ հեղինակություն ունեցող կաթողիկոսի իշխանությունը տարածվում էր տարբեր պետությունների հայ գաղթօջախների վրա, իսկ 1836թ. հաստատված «Պոլոժենիան», պահպանեց հայ եկեղեցու միջազգային դերը և իր համազգային նշանակությունը, ինչպես գրում է Լեոն «Հայոց կաթողիկոսության միջազգային հանգամանքը նա դնում էր ավելի լայն հիմքերի վրա, տրամադրելով, վոր կաթողիկոս ընտրվի վոչ միայն ռուսահայերի, այլև թյուրքահայերի, պարսկահայերի և հնդկահայերի քվեներով և այս նպատակով աշխարհական և հոգևորական պատգամավորներ պիտի ամեն տեղերից գային Եջմիածին ընտրության անձամբ մասնակցելու համար»²⁵։ Յուրաքանչյուր եկեղեցու ինքնուրույնությունն արտահայտվում է նրա դավանաբանական և ծիսական առանձնահատկությունների մեջ։ Այս իմաստով, կարծում ենք, որ «Պոլոժենիեն» չէր սպառնում հայ եկեղեցու ինքնությունը, այլ միայն եկեղեցական նոր կանոնակարգ էր, որի միջոցով Կայսերական Ռուսաստանն արտահայտում էր իր սեփականատիրոջ իրավունքով սեփական տանը կարգ ու կանոն հաստատելու պահանջը։ Ռուսական ուղղափառ եկեղեցին ըստ էության ընդգրկված էր պետական համակարգի մեջ, և եկեղեցական վերնախավը միայն եկեղեցուն վերաբերվող հարցերում էր ինքնուրույն, իսկ արդեն 1721 թվականին Պետրոս Առաջինի կողմից իրականացված եկեղեցական բարենորոգություններով ռուսական ուղղափառ եկեղեցին վերածվեց պետական հիմնարկության և ղեկավարվում էր առանց պատրիարքի, բարձրագույն օրգանի Սինոդի կողմից, որի անդամները ընտրվում էին կայսեր կողմից և վերջնականապես ենթարկվում էր պետությանը։ Կարծում ենք միանգամայն տեղին է Ս.Օրմանյանից այս մեջբերումը. «Արդեն որթոտոքս

եկեղեցւոյն սկզբունքն է եկեղեցական իշխանութիւնը պետական իշխանութեան ենթարկեալ նկատել, եւ կրօնական ու քաղաքական յարաբերութեանց գերագոյն վարիչ պետութիւնը ճանչնալ. բնական էր որ նոր եկեղեցական իշխանութեան մը իւր սահմաններուն մէջ մտած ատեն, անոր վրայ ալ տարածել ուզէր իւր սկզբունքը»:²⁶ «Պոլոժենիայով» Ռուսահայքը բաժանվում է Բեսարաբիայի և Նոր Նախիջևանի, Աստրախանի, Երևանի, Վրաստանի, Շիրվանի վիճակ և Ղարաբաղի թեմերի: «Պոլոժենիեն» կազմված էր 141 հողվածներից, որոնք ամփոփված էին 10 գլուխների մէջ: Հողվածները վերաբերվում էին եկեղեցականների իրավունքներին և արտոնություններին, սինոդին, թեմակալ առաջնորդներին, հոգևոր ատյաններին, կառավարության, եկեղեցական պաշտոնյանների եկամուտներին, հոգևոր դպրոցներին: Այս կանոնադրությամբ թեև կաթողիկոսը ճանաչվում էր Հայոց եկեղեցու գլուխ, սակայն նրա իրավունքները սահմանափակվում էր ութ անդամներից կազմված Սինոդի կողմից: Սինոդի գործերի ընթացքը դրված էր սենատի կողմից նշանակված պաշտոնիայի պրոկուրորի հսկողության տակ: Կաթողիկոսները եղել են ընտրովի, և նրանց ընտրության համար մշակված էր ընտրության յուրատեսակ կարգ: Նախկինում Երևանի խանության աշխարհիկ և հոգևոր ներկայացուցիչների կողմից առաջադրված կաթողիկոսի թեկնածուն ներկայացվում էր Կ. Պոլսի հայոց պատրիարքի գլխավորությամբ գումարվող ժողովում, որից հետո ստացվում էր սուլթանի հաստատության բերաթը: Այսպիսով վճռական խոսքը պատկանում էր Կ. Պոլսի հոգևորականությանը և «իշխաններին»: Շատ անգամներ կաթողիկոսի ընտրության հարցը տարաբնույթ հակասությունների և լարվածության տեղիք էր տալիս Կ. Պոլսի հոգևորականության և Ա. Էջմիածնի միջև, սակայն «Եջմիածինը գրավելուց հետո այդ իրավունքն անցնում էր միայն ռուսաց ցարին. վորովհետև ամենայն հայոց կաթողիկոսությունը, ունենալով հանդերձ միջազգային իրավասություն, համարվում էր ռուսական ներքին հիմնարկություն և ինքը կաթողիկոսն էլ, յեթե ընտրվէր անգամ դրսից, ռուսաց հպատակ էր»:²⁷ Հայոց կաթողիկոսն էր տնօրինում հոգևոր և մշակույթային հարցերը: Ղարեր շարունակ ծայրագույն Պատրիարքի և Կաթողիկոսի իշխանությունը հանդես էր գալիս որպես եկեղեցական հիմնարկություն, իսկ դարասկզբին ստեղծված Սինոդը վարչական հիմնարկություն էր, որի իշխանությունը սահմանափակվում էր կայսրության սահմաններով: Կաթողիկոսի վերահսկողությամբ Սինոդը զբաղված էր դատաստանական և վարչական հարցերով: Հետագայում, 1843 թվականին կաթողիկոս ընտրված Ներսես Աշտարակեցու ժամանակ, Սինոդը մատնված էր անգործության և հենց ինքը Ներսես կաթողիկոսն էր բացասաբար արտահայտվում իր իսկ կողմից ստեղծված Սինոդի գոյությանը: Ռուսական կայսրության սահմաններում Հայաստանի

ինքնավարության և «Հայկական թագավորության» վերականգման ծրագրերը մատնվեցին անհաջողության։ Պատմական նոր շրջադարձի պայմաններում հայ ազգային -ազատագրական շարժման քաղաքական գործիչների առջև դրվեց նոր ժամանակի ոգուն և պահանջներին համապատասխան խիստ կոնկրետ ընդիրներ։ Հայ ազգային ազատագրական շարժման մեջ կարևորվում է ազգի լուսավորության և կրթության գործը, ազգային ինքնագիտակցության վերածնության գաղափարը։ Հայոց եկեղեցու, որպես ազգային-քաղաքական կենտրոնի, կառավարման բարեկարգման, նոր ժամանակաշրջանին հարմարեցման հարցը հրամայական անհրաժեշտություն է դառնում։ «Հայաստանի քաղաքական գոյավիճակը — գրում է պրոֆեսոր Վ.Դիլոյանը—պետք է թելադրեր էջմիածնի միաբանությանը և հայ ժողովրդի ղեկավար շերտերին վարել խիստ զուլափոր քաղաքականություն, որպեսզի վտանգավոր կացության մեջ չդրվեր այն միակ համազգային հաստատությունը, որը շաղկապում էր ցանուցիր հայ ժողովրդին և որը կարողացել էր պահպանել իր գոյությունը փոթորկալից աղետաբեր դարերի բովո՞վ անցնելուց հետո»²⁸։ Հայոց լեզուն ժողովրդի գոյատևման, ազգային դեմքը պահպանելու երաշխիքն է։ Հայ հոգևորականության և ժողովրդի միջև շփման լեզուն մնում էր հայերենը, այս իմաստով Հայոց եկեղեցին հանդիսանում էր հայոց լեզվի պահպանը, ինչպես Լեոն է գրում. — «Հասարակական կյանքի մեջ այդ ազգային լեզուն այն իրավունքն ուներ, վոր միանգամայն արգելված մի բան չեր, ուստի և նրա ազատ շրջակայման համար համայնքի ներսում թույլատրված էր նրան ունենալ տպագրություն, վոր միայն յեկեղեցու պետքերին չեր ծառայում, այլ և աշխարհական պահանջներին։ Սյսպիսով, ուրեմն յեկեղեցին պահպանում էր ազգային լեզուն դաստիարակության գործիք դարձնելու իրավունքը, կամ ուրիշ խոսքով, դպրոցի տեր էր դառնում, ինչպես էր և անցյալում։ Ամենակարևորը, ամենակենսականն այս եր»²⁹։

«Պոլոժենիան» պահպանեց Հայոց եկեղեցու, որպես համազգային միակ հաստատության նշանակությունը, և կաթողիկոսի դիրքը, որքանով այն բխում էր ռուսական կայսրության քաղաքական նկատառումներից։ «Այդ նպատակով, -գրում Լեոն.- պետք էր ներքուստ վորոշ աստիճանով բարձրացնել կաթողիկոսական աթոռի նշանակությունը, տալով նրան իշխանական դիրք և արտոնություններ, վորքանով այս իհարկե, կարող էր թույլատրել պետական տիրող և գերակշռող կրոնը հանձին պրավոսլավ կղերի»³⁰։

Գրականության ցանկ

1. Լեո, Երկերի ժողովածու հ.4-րդ, Երևան 1984, էջ 49
2. Լեո, Հայոց պատմություն, Նորագույն շրջան, Երևան 1927, էջ 489 :
3. В.І. Тунянн, «Формида опискин престол XIX — нач. XXвв. Ерван 2001, сг. 7
4. ԱՂԱՂ, Է. VII, — N 214
5. В.І. Тунянн, «Политика самодержавия в Закавказье I п. XIXвека. Ерван 2001, сг. 42
6. Ալ. Երիցյան, Ամենայն Հայոց կաթողիկոսությունը և Կովկասի Հայք XIX-րդ դարում, մասն Ա, Թիֆլիս, 1895, էջ 487:
7. Ալ. Երիցյան, Ամենայն հայոց կաթողիկոսությունը և Կովկասի Հայք XIX-րդ դարում, մասն Ա Թիֆլիս, 1895, էջ 545
8. Ալ. Երիցյան, Ներսես եպիսկոպոսը Դանիել կաթողիկոսի ժամանակ, Թիֆլիս, 1899, էջ 7
9. ԱՂԱՂ, Է. VII, Էմֆան, 1876, — N 214.
10. Ալ. Երիցյան, Ամենայն Հայոց կաթողիկոսությունը և Կովկասի Հայք XIX-րդ դարում, մասն Բ, Թիֆլիս, 1895, էջ 226:
11. Մ.Օրմանյան, Ազգապատում, Բեյրութ 1927, էջ 3698:
12. Ալ. Երիցյան, Ամենայն Հայոց կաթողիկոսությունը և Կովկասի Հայք XIX-րդ դարում, մասն Բ Թիֆլիս, 1895, էջ 334
13. Ալ. Երիցյան, Ամենայն հայոց կաթողիկոսությունը և Կովկասի Հայք XIX-րդ դարում, մասն Բ, Թիֆլիս, 1895, էջ 302:
14. Ալ. Երիցյան, Ամենայն հայոց կաթողիկոսությունը և Կովկասի Հայք XIX-րդ դարում, մասն Բ, Թիֆլիս, 1895, էջ 375
15. Ալ. Երիցյան, Ամենայն Հայոց կաթողիկոսությունը և Կովկասի Հայք XIX-րդ դարում, մասն Բ, Թիֆլիս, 1895, էջ 375
16. Մ. Օրմանյան, Ազգապատում, Բեյրութ 1961, էջ 3675 :
17. Լեո, Հայոց պատմություն, Նորագույն շրջան, Երևան 1927, էջ 264:
18. Լեո, Երկերի ժողովածու հ.4-րդ, Երևան 1984, էջ 491:
19. Ալ. Երիցյան, Նյութեր Ներսես Ե-ի կենսագրության համար, Թիֆլիս, 1899, էջ 6:
20. Ն.Ֆ Լինգ, «Հայաստան» , թաղ Լ Լարենց, Կ Պոլիս, 1913, էջ 163:
21. Կ.Եղեանց, Ս էջմիածնի Սայր Աթոռի և Ռուսաց կառավարութեան յարաբերութիւնների ծագումը, Թիֆլիս 1904, էջ 13:
22. Ալ. Երիցյան, Ամենայն հայոց կաթողիկոսությունը և Կովկասի Հայք XIX-րդ դարում, մասն Բ, Թիֆլիս, 1895, էջ 379:
23. Գ Լազեան, Հայաստանը և հայ դատը, Երևան, 1991, էջ 10:
24. Լեո, Երկերի ժողովածու հ.4-րդ, Երևան 1984, էջ 493:
25. Լեո, Հայոց պատմություն, Նորագույն շրջան, Երևան 1927, էջ 268:
26. Մ. Օրմանյան, Ազգապատում, Երուսաղեմ 1927, էջ 3675:
27. Լեո, Հայոց պատմություն, Նորագույն շրջան, Երևան 1927, էջ 269:
28. Վ Դիլոյան, Արևելյան Հայաստանը XIX դարի առաջին երեսնամյակին և հայ-ռուսական հարաբերությունները, Երևան 1989, էջ 212:
29. Լեո, Հայոց պատմություն, Նորագույն շրջան, Երևան 1927, էջ 266:
30. Լեո, Հայոց պատմություն, Նորագույն շրջան, Երևան 1927, էջ 263: